

1. Vawiin chawhma lama to thli tleh leh ruahsur chuan Mizoram hmun hrang hrangah chhiatna a thlen a, mihring nunna chan phah erawh chu a awm lo ni a hriat a ni.
2. Isua Krista a thawhleha ni (Easter Sunday) chu khawvel ram dangte rualin Mizoram pumah hlim taka lawm a ni.
3. Deputy Prime Minister hlui L K Advani chu vawiin khan President Draupadi Murmu-in ramchhunga civil mi chawimawina sang ber Bharat Ratna a hlan.
4. President Draupadi Murmu, Vice President Jagdeep Dhankar leh PM Narendra Modi ten ramchhung leh pawna Kristian-te Easter chibai an buk.

<><><>

**THUNDERSTORM**

Vawiin chawhma lama to thli tleh leh ruahsur chuan Mizoram hmun hrang hrangah chhiatna a thlen a, mihring nunna chan phah erawh chu a awm lo ni a hriat a ni.

Tukina thlipui tleh khan April ni 12 a Mizoram pum huap Presbyterian Pavalai Pawl inkhawmpui lian neihna tura sak, Serchhip Dist East Lungdar khelmual ami chu a len tlu sawp hneh hle. East Lungdar VCP Pu K. Lalngaizuala hnen atanga thu danin-February thla tawp a sak zawh tawh he pandal hi peih fel thawkhat ni tawhin, chei mawi leh thuam that chauh an hmabak tawh a. Pavalai hruaitute sawi dan chuan pandal sak hna hi za zela 98 zawhfel tawh a ni. Inkhawmpui tan hun Chawlhni vawi khat chauhin a dang tawh tihin a tlu sawp ta vek a. Pandal ruh rel hi KTP ta niin a chak awmsa tun dina sak leh pawh a harsa hmel tawh a, mipuiin a seng hawi hnatlang an nei nghal a. Vawiin chawhnu inkhawm ban hian VCP kaihhruaina hnuaiyah thutkhawm hmanhmawh an ko a, pandal sak leh dan leh thil tul dang te an ngaihtuah dawn a ni. Hriat theih chinah tukin dar 9:30 vela thli tleh hian East Lungdarah hian chenna in 10 chuang len chhia a ni.

Chhiahtlang South ah pawh chenna in 5 leh Baptist kohhran Biak in choka nen, in 6 a tichhia a, Khawlailung ah chenna in pakhat chu a liang chawpin a la a, Chekawn khuaah in pakhat a chhe bawk. Paraglyding thlawh chhuahna gallery leh riah buk chung pawh a tichhe nual a, thli in leh ruahin a len chhuah bawlhhlawh, khawlaiah a tam hle bawk a ni.

Vawiin chawhma lama To thli leh ruahrawn thawk chuan Champhai District chhungah chhiatna a thlen nual a, Mihring tawrhna erawh chu a thleng lo. Hriat theih chinah Champhai Rahsi Venga Pu C.Hualthanzuala Assam Type building chu thli-in a len chhe vek a, vawk leh arte an him bakah mihring tawrhna a thleng lo. Champhaiah chuan Pu SH. Lianchhunga, Vengsang (concrete in) a chung rangva a khuh chu thliin a lenchhia a, Pu Chhanlian, Vengsang PHE Veng inchung thenkhat pawh thli in a la a, Pu Hrangchina (L) Kanan veng inchung thenkhat thli in a la bawk.DC hmun hlui kiangah thing tluin kawngpui sira Car pakhat dinglai delh chhiain Champhai Vengsangah thing tluin Excise & Narcotic Dept.office panna a hnawh. Pinehill Adventist Academy pisa leh step chung rangva a len chhe vek. Sikul chunga tui dahkhawlna a len chhe vek a, Sikul quarters pakhat a chung a hawk a, pakhat chu a len chhiat bakah Sikul kawta an thing phun engemawzat a len tlu bawk.

Vaphai khua ah chuan Higher Secondary School chung hmun 3-ah a hawk a, tuizem pakhat a chhe bawk. Pi Mathangi in nak lehlam, a in thlang lam chung rangva chum chawpin a la, Pi Ruatzuali in a nuai chhhe deuh vek a, a in hma lam bang chhete a la ding der der a. Pu Saithanngenga fate in bual-in chung a hawk sak a, Pu Zarzomawia pangngang khawina in, raltlanin an luah mek chu a chung a hawk sak bakah a bang a chhe nual a, Pu Lawmpuia in bang a la nual a, Pu Laldawngliana in pawh a chhe nual a, an in hi a derhawng deuh sa a, sak thatsak an ngai hialin a rinawm, Pu Laithangngura in pawh a chung rangva a hawk nual a, mimal Vawkin chung a hawk nual bawk.

Bungzung khua-ah chuan Pu R. Zarzoliana leh Pu Hranglawma in chung a hawk sak bakah Civil Supply Godown chung, Bungzung High School choka leh Varandah chung leh Presbyterian kohhran Sunday Sikul chung a hawk sak. Zokhawthar ah chuan Wesleyan Methodist Kohhran Biak in chung a hawk tih loh chu thil dang chhia hriat a ni lo. Hnahlan-khuaah ah Pu C. Zorinpua in (a chung thenkhat leh bang thenkhat), Pu Darchungnunga in a chung rangva thenkhat thliin a hawk sak thung a ni. Khawbung khua-ah in pakhat a chung a lak bakah a bang a tichhe vek a, an khaw thlanmual a theihai kung tlu chuan thlan a tichhe nual bawk.

Khawzawl district-a Lungtan khua a UPC (Mizoram) biakin chu thlipui hian a chhem chim a, thi leh hliam an awm lo ni a thudawn a ni a. Sialsuk Hmunchung Presbyterian kohhran biakin pawh pulpit awmna zawn inchung chu thlipui hian a hik a ni. Nimin tlai leh tukin khan Mizoram hmun thenkhatah thlipui, tek leh ruah a nasa hle a. Thil a tihchhiat kimchang hi hriat theih a la ni lo.

Thli tleh hian Mamit khawpui chhungah chenna In engemawzat a tichhia a, W. Phaileng atanga Mamita kawlpheha lakluhna kawngah harsatna a awm avangin W. Phaileng lam atangin kawlpheha lakluh theih a ni rih lo. Mamit khawpui chhung VC hrang hrang hruaitute hnen atanga thu dawn danin Luangpawl VC huam chhungah Pu Lalrindika In chu a chung thli-in a la a, vawiin khan VC leh YMA chuan hnatlang koin inchhia thawm hna hi an thawk nghal a ni. RMSA School building leh chowkider quarter chung a la bawk. Heng bakah hian chhe nasa lo, In 3/4 vel a awm bawk. New Mamit VC huam chhungah Pi Zoremthuangi In bang a tichhia a, hei hi vawiin vek khan VC leh YMA ten an thawm tha lehngal a ni. Chhimveng VC huam chhungah Pi Lalrinawmi In field veng ami chu a chung a la a, naktuk lamah hnatlanga siam a ni ang. Venghlun branch YMA building, mimal luah chu a chung rangva a la a, vawiin vek khan thawm that nghal a ni.

W. Phaileng atanga Mamit-in kawlpheha a lakluhna pawh a chhe nasa hle nia hriat a ni. Kawlpheha lakluh leh thuai a nih theihna turin Power department hnathawkte chuan theih tawp an chhuah nghal a, vawiin vek khan hmun thumah inthenin kawlpheha lakluhna hrui chhian lai an zawng nghal a. W. Phaileng kawngah thir hrui mau in a vuak tam tak a awm a, hei hi EE hovin theih ang anga then nghal zel a ni. Dampui kawng hlui lamah thingin kawlpheha hrui a vuak engemawzat a awm bawk a, hei hi group dangin a then hna an thawk nghal bawk. Mamit khawpui chhungah group dangin hrui chhia zawn leh siam hna an thawk bawk a ni. W. Phaileng atanga eng lakluh theih hun tur hriat theih a la ni lo.

Mamit district disaster cell in a chhinchhiah dan chuan Mamit khawpui chhung bakah Kawrtethawveng a Pu GH Engzama Inchung leh Govt. Kawrtethawveng middle school-2 chung thli in a la a. Damparengpui khuaah pu piangthara choka inchung thli in a la a. Heng bakah hian Parvatui, Darlak, Rawpuichhip ah te In chung thli in a lak leh a bang atih chhiat an awm bawk. Mamit a kan Corr sawi danin vanneithlak takin

mihring inhliam erawh an awm lova, in chhia report dawn ho zingah hian a vai a chhia awm lovin thawm that leh theih deuh vek a ni hlawm.

Saitual district-ah pawh tukin to thli thawk khan chhiatna a thlen a. Tawizo khuaah chenna In thenkhat a chung rangva hawk leh bang chhia a awm a, hriat theih chinah In panga leh Bazar shed chung a lenchhia a, vanneihthlak takin hliam tuar leh nunna chán an awm lo. Thil awmdan a hmuna enfiahin Pu VL Chaka Hmar SDC Saitual DC office leh a hoten Tawizo khua hi an pan nghal a, in leh lo chhiat dan azira State Disaster Respond Fund atanga tanpuina awm theite khawtlang hruaitute an sawipui. Vawiin vek khan in chung hawk leh bang chhiate chu khawtlang hnatlangin a theih chin chin an siam tha leh nghal a, hmabak awmte naktuk hian an chhunzawm leh ang. Heng chhiat tawk te chanchin hi hriat a nih rualin bialtu MLA Prof. Lalnilawma pawhin hma la nghalin, Sawrkar official biak ngaite a be nghal a. In chhe siam hnatlangte thingpui lumna VCP Tawizo kaltlangin a hlan nghal bawk.

<><><>

#### **EASTER**

Khawvel chhandamna atana khenbeh a nih hnu a mihringte'n chatuan nunna an neih theihna atana Isua Krista a thawhleha ni (Easter Sunday) chu khawvel ram dangte rualin Mizoram pumah hlim taka lawm a ni.

Tukin zing khawvar hlim khan Chhandamna Sipai Pawl band party-te chuan, "Fak r'u Isua a tho ta," tih hla chu Aizawl khawpui leh khaw hrang hrangah rimawi hmangin an rem a. Kohhran engemaw zat thalaite chuan ni chhuah rualin biakin emaw biakin tualah emaw Pathian biak inkhawm an huaihawt bawk a. Presbyterian kohhran chuan Pathianni danga Sunday School awm thin kha ti lovin Kohhran pui-ah Isua Thawhleha Ni hi an lawm a. Chawhma inkhawm thupui atan 'Thawhleha thu chu thu mai maiah an ruat' tih a ni a,

Chawhnu Inkhawm Thupui atan 'Mi dek ula, en rawh u' tih an hmang a. Zan Inkhawm Thupui atan 'Kumkhua a kan hnena awm zel a tiam,' tih an hmang dawn a ni. Chawhma inkhawm banah Krista Thawhleha ni pualin thingpui ruai buatsaih a ni a, 'Easter Egg' ti a sawi artui cheimawi leh thingpui hmeh hrang hrangte inkhawmhote'n an changho a ni.

Krista Thawhleha Ni hi Catholic Kohhranah chuan inkhawm zawnga urhsun ber leh ropui bera an neih a ni a. Vawiin Easter Sunday-ah pawh mass buatsaih lehin kohhran tam zawk chuan ruai an theh a. Zan lamah sathau khawnvar chhi engin Isua thawhleha pualin Easter procession an tih mai, mawmbati kenga kawngzawh an huaihawt leh dawn a ni. UPC - Mizoram leh North East India te chuan an remchan angin anmahni kohhran theuhah hun an hmang a. Thingpui ruai an buatsaih tlangpui a, kohhran thenkhatah tlaiah ruai an theh bawk a ni.

<><><>

#### **POLL-MAIN PLANKS**

April ni 19 a vote thlak tur, Mizoram Lok Sabha bial inthlanna atan political party hrang hrang leh candidate 6-te chuan beihpui an thlak chhunzawm zel a, an inzawrh dan a inang lo.

Roellai ZPM candidate Pu Richard Vanlalhmangaiha chuan Lok Sabha MP a thlan tlin a nih hnu-ah NDA lamah nge INDIA lamah a thut dawn tih chu an party hruaitute thu thu a nih thu a sawi a. Mizoram sorkar thlawp a a tul ang anga thawk turin a inpe dawn niin a sawi a. Mipui hmasawanna atan sum tam tham tak hai chhuak turin a bei dawn tih a sawi bawk. MNF candidate Pu K. Vanlalvena chuan thlan tlin a nih chuan NDA lamah a thu dawn tih sawiin BJP kaihhruai NDA hi inthlanpui-ah hian an chak leh ngei a rin thu a sawi a. NDA-ah awm mah sela, Mizoram leh mipuite tana thil tha lo an tih chuan theihtawpa dodal a, Parliament chung leh pawnah Mizoram leh state danga Mizo awmte thlang na takin a hauh zel dawn niin a sawi a ni. Congress candidate Pu Lalbiakzama chuan Mizoram leh hnam bakah India rama hnam leh sakhaw tenau zawkte humhim tura ding a nih thu sawiin, BJP chu ramchhunga sakhaw tenau zawk beutte nek chepah a puh a, an thlang hauh chu a thiltum ber a ni dawn thu a sawi.

BJP candidate Pu Vanlalhmuaka chuan hmarchhak biala MP candidate zingah amah chauh BJP unit president awm chhun a nih avangin len NDA an sorkar leh ngei dawn avangin sorkar laipui-ah dinhmun pawimawh tak a chelh dawn niin a sawi a.

Mizoram sum harsatna tawh mek chhawk zangkhai a hmasawna thlen kawngah a pawimawh dawn niin a insawi. MPC candidate leh tun tum Lok Sabha inthlanpui a Mizoram atanga hmeichhe candidate awm chhun Pi Rita Malsawmi chuan thlan tlin a nih chuan sorkar laipui ministry hrang hrang atangin mahni kutkawiha eizawngte tan tanpuina hai chhuah chu a hna pawimawh tur a nih thu a sawi a. Independent candidate Pu Lalhriatrenga Chhangte chuan a din chhan a la puang rih lo thung a, party candidate a nih loh avangin mipui candidate-a a inngaih thu a sawi a ni.

<><><>

### **BHARAT RATNA**

Deputy Prime Minister hlui L K Advani chu vawiin khan President Draupadi Murmu-in ramchhunga civil mi chawimawina sang ber Bharat Ratna hlan a ni. New Delhi-a President chenna inkhawm buatsaihah hian Vice President Jagdeep Dhankhar, Prime Minister Narendra Modi, Vice President hlui M Venkaiah Naidu, Defence Minister Rajnath Singh, Union Home Minister Amit Shah leh Pu Advani-a chhungte pawh an tel a ni. President Draupadi Murm-i chuan Pu Advani chuan a theihna zawng zawng ram tan a hlan tih sawiin kum 70 chhung a theihna ropui tak a hmang a ni a ti.

Puan tawh angin nizan khan Prime Minister hlui P V Narasimha Rao leh Chaudhary Charan Singh, agriculture scientist M S Swaminathan leh Bihar CM hlui Karpoori Thakur te chu an thih hnuah civil mite chawimawina sang Bharat Ratna hlan an ni a. New Delhi-a Rashtrapati Bhavan-a hlanna inkhawm buatsaihah President Draupadi Murmu-i chuan chawimawina hi an chhungte hnenah a hlan a ni.

<><><>

### **EASTER**

President Draupadi Murmu chuan ramchhung leh pawna Christian zawng zawngte Isua Krista thiha thawhleha champha Easter chibai a buk. Pi Murmu-i chuan he hun hi Isua Krista thawhleha hriatrengna a nih thu leh hmangaihna leh lainatna entirna a ni a ti a. Easter hian thudik tlo zia a lantir tih sawiin mitinte midang tana inpekna nun leh inngaihdamna nunkawng zawh turin a sawm a. Isua Krista zirtirna te chuan remna leh muanna kawngah min hruai dawn a ni a ti bawh.

Vice President Jagdeep Dhankar pawhin Easter pualin ramchhunga Kristiante chibai a buk a. Hmangaihna, lainatna leh ngaihdamna hlutzia min hriatchhuah tirtu a ni tih sawiin he hun ropui tak hian mitin nunah remna leh muanna a thlen a beisei thu a sawi a ni.

Prime Ministe Narendra Modia pawhin mipuite Easter chibai bukin hmun tinah intuaitharna leh hmalam hun a eng zawnga thlir tura fuihna ni anih thu a sawi a. Inpumkhatna leh inremna siam a, inlungualna ni atan hman ni se a duh thu a sawi a ni.

<><><>